

Poziv za dostavljanje prijava na međunarodni skup

## 3. KONGRES ARHIVSKIH RADNIKA BIH

Hotel „San“ Laktaši, 5–7. 6. 2019

Organizacioni odbor 3. kongresa arhivskih radnika Bosne i Hercegovine i Arhivističko udruženje Bosne i Hercegovine sazivaju treći po redu Kongres arhivskih radnika u vidu trodnevne stručne i načne konferencije. Pored izlaganja podijeljenih u tri tematske cjeline, predviđeni su i drugi prateći sadržaji. Mjesto održavanja je **Hotel „San“ Laktaši**. Vrijeme održavanja kongresa je **od 5. do 7. juna 2019.** godine (od srijede do petka), u susret Međunarodnom arhivskom danu. Teme kongresa i njihovi konceptualni okviri su sljedeći:

### 1. Arhivi i obrazovanje

S obzirom na činjenicu da je u prethodne dvije decenije u globalnim okvirima došlo do značajnog napretka informacionih nauka – arhivistike, bibliotekarstva i drugih srodnih disciplina – stručna arhivska zajednica u regionu dužna je učiniti potrebne korake da bi se međunarodni trendovi sustigli. Ovom temom otvaramo diskusiju o razvoju arhivistike kao naučne discipline, o poziciji arhivskih ustanova i udruženja u tom procesu, o perspektivama arhivistike u visokom obrazovanju itd. Tema takođe može da obuhvati i druga pitanja o arhivima i obrazovanju uopšte, uključujući i stručnu edukaciju, saradnju arhiva i obrazovnih ustanova i odnos sa drugim naučnim disciplinama.

### 2. Arhivska građa BiH van BiH

Iako obilježena strogim kontekstualnim crtama provenijencije, sadržajna vrijednost arhivske građe često prelazi institucionalne i državne granice, dok je njen fizički nosač podložan pomjeranjima preko tih granica. Građa koja nastaje u jednoj zemlji može se otuđiti, prenijeti, sakriti, u nekim slučajevima da bi i sama bila sačuvana od nestanka. S druge strane, građa koja nastaje van granica te zemlje, može služiti kao višestruk izvor informacija o procesima koji se te zemlje direktno tiču. Ova tema ostavlja prostor za razgovor kako o građi koja je nastala u Bosni i Hercegovini ali više nije na njenoj teritoriji, tako i o građi koja je akumulirana van Bosne i Hercegovine ali o njoj neposredno govori.

### 3. Arhivi u eri dezinformacija

Termin „postistinito“ odnosno „postčinjenično“ (post-truth) izabran je od strane redakcije Oksfordskog rječnika za riječ godine 2016. Proliferacija lažnih vijesti, 24-časovni ciklusi izvještavanja u realnom vremenu, informisanje bazirano na internetu i globalna dekadencija političke kulture obilježile su savremeno doba kao eru laži i obmana. Pored pitanja o ulozi arhivske profesije i njenih institucija u vremenu masovnog protoka i akumulacije dezinformacija, nameću se i druga, do sada neodgovorena pitanja. Kakva su iskustva arhiva sa drugim formama nametnutih istina, datih određenom ideološkom hegemonijom? Kakva je uloga arhivista u smjenama dominantnih istorijskih narativa? Kakva je pozicija arhiva u tekućim naletima istorijskog revizionizma? Konačno, mogu li arhivisti biti neutralni akteri u procesima zaštite građe, upotrebe informacija i stvaranja metapodataka?

Prijave za učešće na konferenciji moraju sadržavati sljedeće elemente:

- Ime i prezime autora
- Grad i zemlju iz kojih dolazi
- Instituciju ili organizaciju iz koje dolazi
- Naslov izlaganja
- Sažetak/apstrakt od 200 do 300 riječi

Prijave dostavljati u vidu email poruke na adrese: [arhu.bih@gmail.com](mailto:arhu.bih@gmail.com) i [vladanv@live.com](mailto:vladanv@live.com)

Rok za dostavu prijava: **31. mart 2019.** godine

Jezici konferencije su službeni jezici u Bosni i Hercegovini, Srbiji, Hrvatskoj i Crnoj Gori i engleski jezik. Programski odbor će odmah obavijestiti prijavljene o prijemu prijava. Obavještenje o prihvatanju i uvrštavanju izlaganja u program izlagači će dobiti do 20. aprila 2019. godine. Odabrani izlagači će imati obavezu da pripreme adekvatne vizuelne prezentacije.

Mjesto održavanja kongresa je Hotel „San“ u Laktašima. Učesnici rezervišu smještaj direktno ili u dogovoru sa domaćinima i organizatorom. Kontakt informacije hotela: Banja Laktaši, Hotel „San“, Karađorđeva 44, Laktaši — tel. 051 532 256; email [repcija@termelaktasi.com](mailto:repcija@termelaktasi.com)

Učesnici konferencije će blagovremeno biti obaviješteni o svim promjenama i važnim informacijama.

Do susreta na 3. kongresu

Organizacioni odbor / Programski odbor

3. kongresa arhivskih radnika Bosne i Hercegovine